

第十七本

卷三十一

藝文中四

46

遂表疏記

卷三十二

藝文中五

50

遂序雜著

嚴州府志

笑廬署

嚴州府志卷之三十一 遂安縣

藝文

表疏
記

謝獎諭敕書表

宋 詹儀之

臣儀之待罪桂林以淳熙十年季秋到官十二月癸酉安
化蠻蒙光漸等寇宜州境掠省民殺吏卒臣遣騎諭以禍
福蠻扭勝跳躍莫可告語臣於是決意進討調發諸項軍
馬以本路鈴轄沙世堅節制之檄提點刑獄熊飛督捕正
月官兵既集辛丑甲寅兩戰大捷賊始震驚奔潰然猶懲
往轍且疑且阻臣推廣聖訓載飭軍吏退舍堅壁開其自
新之路迺二月癸未光漸等果詣軍門納款乞降給田輸

賦比附內屬臣旣平定卽日旋師具以戰功等差奏八月
癸未得旨將佐以下若死事陣傷咸被醲賞視前有加越
翼日甲申詔學士院降敕書獎諭命下之日懽聲動地臣
仰惟皇帝陛下睿算無遺神武不殺道德之威懾乎中外
蠢茲蠻獠敢犯邊陲皆臣制閫無狀豈敢逃刑陛下洪福
如天旣赦其過又錫之璽書訓詞溫厚雲漢昭回此希闕
之典非下臣之所宜蒙臣跼踖拜賜感懼交集吏民聚觀
歎息罕見臣竊伏念昔夫子作春秋一字之褒榮踰華袞
蓋聖人筆削名器所繫其重如此今陛下所以假寵於臣
曾不少吝豈無指哉在易師之九二在師中吉承天寵也

王三錫命懷萬邦也說者謂在師中吉以其承天之寵任也人臣非君寵任之則焉得專征之權而有成功之吉王三錫以恩命褒其成功所以懷萬邦也陛下之意得非欲藉臣愚以爲天下勸乎詩亦有云王猶允塞徐方旣來徐方旣同天子之功臣雖不敏敢不玩易誦詩以對揚天子之不顯休命敬鐫金石垂示久遠以爲子子孫孫家藏之寶云

慎名器申舊例疏

明
余 鏐

竊惟天生五材兵不可去國有八柄賞在所先故古之明主尚愛嚙笑賞當其功斯謂不僭財賦之歲入有限爵祿

之糜費無窮若不預爲之所其何以善厥後臣待罪武選甫踰期月每閱邦政有不當于心輒仰屋竊歎謂聖明在上勵精圖治正當更化之日此而不言是謂失時失時自棄是謂不忠不忠之臣陛下亦安所用之用是夙夜焦思謹以邦政應議七條附釐吏弊一條上厘聖覽大要明祖宗之法令酌事勢之輕重汰冗濫之武職省糜費之俸糧釐奸剔蠹質之人情律以王法務使言皆有稽事可經久前此之隸武選者夫豈不知而不欲言者或惕于權勢或虞夫謗毀展轉思維咸謂事體重大難于任怨故爾中輟臣非不知言出而怨生怨生而謗興謗興而禍隨獨念敬

事後食苟利社稷死生以之故不恤人言不欺陛下冒死
一言耳伏望皇上察臣報國之初心憫臣官守之攸係思
衆怒之難犯慨流弊之當更特勅廷臣會議果以臣言不
謬大奮乾綱卽賜採納定爲條例一體施行庶爵賞不至
大濫國用不至匱乏而武選爲之一清矣計開條議八事
一曰遏軍職濫襲之弊二曰嚴軍功陞級之法三曰論功
行賞當以賊勢大小爲次四曰捕盜已經陞級者不得重
陞五曰申明替職舊例以限年六十爲止六曰禁革奏帶
人員以絕買功奪功之患七曰清流官自百戶至指揮使
俱係流官宜查黃選無世襲字不許槩襲八曰釐吏弊必

先更法

請祀醕儒王守仁疏

余乾貞

邑人

臣伏觀先臣新建伯王守仁先該吏禮二部會議疏請卹典先帝復其原爵賜以誥券薄海內外踊躍騰懽乃者皇上復因言官建白以守仁從祀廟庭行翰林院等衙門從公謨議臣有以仰窺陛下之心卽光皇帝崇儒重道之心也守仁之學術事功曾經在廷諸臣會議題覆臣愚以爲禮應從祀無可疑者何者道有正脈學有宗傳守仁申明良知之旨蓋聖門易簡之學也其造詣之精統緒之正無可議矣乃不得一分俎豆於廟祀臣竊惜之或者謂其爲

禪耶夫禪外人倫遺物理不可以治天下守仁經文緯武
動有成績其疏犯中璫則直矣綏化還方則仁矣首倡勤
王則義矣芟羣凶平大難則勇矣處權奸寢逆謀不動聲
色則智矣圓融變化不倚一偏禪之學能乎哉謂其與朱
子相牴牾耶守仁年十八聞婁諒言卽從事元晦格致之
學及讀上光宗疏又以循序致精者日體驗之則守仁之
於朱學蓋殊途而同歸者矣朱子中和之說與通書異本
義之作與易傳異謂朱之牴牾周程可乎況陸九淵之學
與守仁同先年肅皇帝嘗允言官之請而進之從祀矣守
仁獨不可乎方今聖明在上正吾道昭明之秋典禮修舉

之會所以表彰正學丕振風聲端有在於今日也伏願採
僉同之見明道統之傳紹有宋之休嗣先皇之斷勅下禮
部俾守仁與薛瑄並祀孔庭則士習益端人心益勸而唐
虞之治再見于宇宙間矣

條議漕政疏

毛一鷺

遂安人

臣聞習者巧之所避害者利之所乘臣不敢侈言習業已
受事十月不可謂不習也臣不敢濫言害嘔盡心血僥倖
報成則固嘗其害也謹因已習已嘗者一畢其愚一曰缺
舡當速造也漕糧賴有漕船而船數準諸糧數查舊例設
期甚預程限甚嚴乃邇年來非廢缺不造耽延後期有一

幫缺船至數十隻者有造船延至四五月始到水次者勢不得不僱募洒帶僱募則腳價無出洒帶則載重難行兩受其弊請嚴飭行淮廠及時補造併行各省兵糧道通查缺船若干先借庫銀辨造給旗領駕造船不得過八月完工不得過十月駕赴水次不得過十一月法在必行遲誤降罰造完之日督造官將發水日月揭報院道以便稽覈仍出印結付領運官收執以便查對庶運官不得借缺船爲遲局有司不得借無船爲口實何舊限不可復哉一日造船當定式也船有定式未有漫無裁制之理查祖制每船載正耗米不過四百餘石又每船許帶土宜六十石卽

從寬格每船載五六百石止矣乃今各船無不可容千石者若江廣糧船皆由旗軍幫造放樣長大恣所欲爲每於兌糧完後卽滿載貨物船重如山勢不得不難淺起剝移船如山勢不得不前脫後擁宥之則舟膠繩之則軍遁請自今始各省盡革幫造陋習長短廣狹俱限以制越制者監造官必罪不數年舊船盡而船畫一沿途旣省貿易之遷延又免膠淺之盤剝可不煩催趲而自速矣一曰軍容當整練也漕糧係軍國命脈計數四百餘萬計程數千餘里中途水旱盜賊時有不測先年以民糧而改軍運豈無深意哉緣承平日久官多統袴不知教演爲何術卒皆外

水不知武藝爲何物儻遇卒起之變非烏驚魚潛則藉寇
齎盜矣宜令各船預備弓刀火藥諸器赴漕儲道覈實比
以什伍分以揮使統以把總於漕隙或阻幫時沿途操練
拔其精者充爲旗綱登之薦剡使聲息相通首尾相顧此
今日運軍第一議然空拳制梃不可撻賊緊關尤自備器
械始葢軍藉利器以防衛旣嚴軍實又壯國威不可不講
也一曰泲河當完工也數十年以來開泲避黃最爲得策
泲開而百里安瀾千帆穩渡尤爲漕事永利當時節嗇金
錢未能展令深濶河身未免淺狹耳淺則遇旱易膠狹則
方舟不能竝進未免耽延時日宜以狹處展之使寬淺處

濬之使深其崖岸冲殘處爲之修葺俾緯道無阻卽全利
矣又泲河計程三百里夏鎮中河兩分爲政屬夏鎮者有
閘九座其節宣濟運也易屬中河者閘無一焉歲藉草壩
以爲常其蓄貯濟運也難今中河分司議於直口泲口劉
口建石閘三座真一勞永逸長計臣愚以爲直口當清黃
交會之衝必須連建二閘一啓一閉旣免水湧湍急爲舟
楫之害又免黃水倒灌以致淤塞此泲河未盡之功亟宜
修舉者也一曰水櫃當清查也國家歲漕四百萬石所賴
以轉運者漕渠衣帶水耳卽河水充盈尚須節宣啓閉稍
遇亢旱河流立涸漕艘豈能飛渡查汶上縣有蜀山湖東

平州有安山湖濟甯有馬場湖沛縣有昭陽湖先朝尚書
宋禮設爲水櫃以濟漕渠各建斗門如漕河漲則減水入
湖以殺其勢漕河涸則放水入河以濟其流計慮何深遠
也邇來奸徒於瀦畜之處竟作耕藝之場有司利其租稅
遂令河漲而不能洩水涸而無以濟卒遇旱乾水溢必大
誤運船湏待任勞任怨之人重以事權假以便宜效則破
格優遷不效則加以治水無功之罰庶可鼓而動乎一曰
衛河當疏濬也查衛河發源於輝縣梨刀泉至元城而益
以漳水故元年虞泛不虞涸自漳河北徙輝流單弱衛河
遂有壅淤之患向來議濬淺議建閘議導疏言人人殊夫

閘以蓄水必不得已而建者也衛雖閘有塞淤但得口外
一閘足矣安所需多閘爲哉考漳河故道自臨漳淤口起
至元城縣小灘鎮止約二百餘里河身現存不煩工力而
淤塞者僅十二里挑濬亦非難事近口處所須築橫堤以
障北流使歸故道計所費不逮萬金所微有異同者漳水
有時漲沒而大名適當其衝臨清適滙其流耳然聞漳未
北徙之先數十年僅一泛漲亦不甚害豈遂因咽廢食哉
次之則有濬小丹河一策丹河爲沁河流派自河內縣清
化鎮起至合河鎮與梨刀泉合流以濟運者也查合河出
水之口濶四丈有奇而上流則深濶各不過五尺許須大

加挑濬令深濶與合河等請勅河臣主行委山東河南兩道交任之較障漳河似屬第二義然省於用力又捷於取效反覺勝一籌矣一曰白糧宜先趨也白糧關係上供豈宜緩於軍儲況覈其數僅當漕糧二十分之一舊時定限正月開幫蓋以不欲偏處以爭此水今開幫遲至三四月勢不得不與漕船挨幫遞進而徃徃開隙賈爭自今以始白糧必令十二月兌完正月開幫不與漕船相值而所僱民船又免招外水烏合流棍漕軍更何所肆其咆哮尤防患上策也以上數款俱臣閱歷採訪皆今日漕運極切要之事臣從習焉知之者也他如僉選旗甲宜公解給月糧

宜速北船幫次宜叙白番詐害宜禁則漕臣所得徑行已
經申飭無敢瑣列又如沿途之防護宜周白河之船袋宜
加臨德之倉廩宜修總鎮之裁設宜酌臣向所開陳已蒙
採擇亦無敢再瀆乞勅下戶工二部議覆施行

宗正寺丞駕部郎中詹公祠記

宋俞武

大宗正寺丞駕部郎中詹公以嘉定八年秋剖符新安上
以新安旱旣太甚將一意撫摩非公莫可遣也公控辭弗
許提舉常平李公道傳聞而賢之曰詹子南奇人新安吾
無憂矣公入境究心荒政食息不遑疲瘵少瘳迺興庠序
以隆風化自宮廊殿廡齋室堂奧表裏崇飭煥然一新功